

BN Selangor Bakal Adakan Program Untuk Dengar Masalah Rakyat Selangor
Bernama
26 Jun, 2012

SHAH ALAM, 26 Jun (Bernama) -- Barisan Nasional (BN) Selangor bakal melaksanakan program bertemu rakyat khusus bagi mendengar aduan serta rintihan yang dihadapi rakyat Selangor ekoran masalah yang tidak dapat ditangani kepimpinan kerajaan negeri itu.

Koordinator BN Selangor Datuk Seri Mohd Zin Mohamed berkata program itu dirangka supaya anggota BN Selangor dapat turun padang untuk bersemuka dengan rakyat bagi menyelesaikan masalah yang sekian lama dihadapi mereka.

"Masalah yang sering menjadi rungutan rakyat Selangor ialah isu sampah yang tidak dikutip, longkang yang tersumbat dan banjir kilat di beberapa kawasan di negeri ini.

"Sehingga kini, program yang ingin kami laksanakan masih di peringkat perbincangan dan masih dirangka, namun ia dijangka diadakan sebelum Ramadan ini" katanya dalam pada sidang akhbar di Bangunan Umno di sini.

Mohd Zin berkata BN Selangor turut mengambil langkah melanjutkan waktu operasi talian Pusat Khidmat Rakyat (Pakar) BN Selangor dari pukul 9 pagi hingga 9 malam bagi mengumpul maklumat berhubung masalah yang dihadapi rakyat.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=676012>